

» le parte de Pixia, vegnuda qui per la via de Bologna a requixicion del Gardenal de
 » Bologna, el qual fo Misier Piero da la Randa, (1) tute vegnude a la Dogal Signoria,
 » per le qual tute faremo mencion, el nome dy diti Ambassadors qui de soto alegando, et
 » contignando per molte sue alegacion, favorizando la creazion del dito Papa Alexandro
 » V eser Pastor, e Vichario vero per lo nome de Christo in tera, pregando, et infor-
 » mando sempre la Dogal Signoria, a questo quela se debia voler tegnir e confermar;
 » chonziosiachè questa elicion sia sta provada, e hotentichada per la vera concordia e
 » honion de tuta la Gliexia honiversal de Dio; et apresso de questo confermando questa
 » santa Signoria voler questo acetar e creder e hobedir seria a tuto el mondo luxe e ma-
 » teria de aconzarse questa sisma, la qual per molto tempo ha regnado in el mondo, et
 » anchora poria esser chaxion de aconzarse la sisma dy Grexi, de redur quelì ala Fede
 » Chatolicha Christiana, la qual sisma ha durado per longissimo tempo sul mondo tuto
 » in tera; e sozonzando chon molte e simel altre parole, quando per questa chomunitade
 » si condesendese a voler questo, che tuto lo resto del mondo de christianitade ligneria,
 » e faria questo per veritade, et aconzeriasse da ogni parte el mondo tuto, e pur quando
 » altramente fose, i dubiteria, che ochoreria, over poria ochorer per lo avegnir la dita
 » chomunitade non ne remagneria consolada, pregando asè per la plu afermativa parte
 » tanto presto, quanto se podese, a quelì y fose dato risposta de spazamento et aziochè
 » tanto ben non se restase de durse a bon complimento.

» E holdido tute le parte dy sovraditi Ambassadors, e Maistri, e Dottori, tuti per plu
 » zorni, per lo serenissimo Misier lo Doxe Misier Michiel Sten, e Savy, e Consieri suo,
 » et procholatori, et per molti del Chonseio nostro de Pregadi, per Misier lo Doxe a
 » questi fose risposto in questa forma.

» Signori, nu avemo ben intexo le vostre raxon e pro e contra de intrambe le parte
 » ben e delizentemente; ma chonsiderando asè a questi fati, i pareva eser grandi e vo-
 » lerne aver molto pensamento, e chose che schazea (2) ai fati dele aneme, de volerne
 » aver respeto de respondere con deliberado e maduro chonseio, circha ale predite chose
 » chon Dottori de Leze, e Maistri in decretali, e de raxon De Clementine e Savy de scien-
 » cie zivil e chatolice e mondane e apreso abudi i chonsei nostri de Pregadi tanto pre-
 » sto, quanto se podese, y se daria risposta, et abudone pluxor zorni de respeto da
 » pensar circha de le predite chose, tornandose prima al Creator eterno Signor Dio,
 » pregandolo, e fazando pregar per tuto el Corpo dy Monastery, et Parochie de Venie-
 » xia a tuta la Clerexia dy Prevedi, Frati, e Servi de Dio, invocchando el nome de Chri-
 » sto, e de la soa Mare de gracia benedeta Verzene Maria, et apresso del Protetor no-
 » stro biado Santo Marcho Vanzelista, fazando cantar molte messe e procession, e Letanie
 » e Oracion.

» Domenega ady 18 del mexe d'avosto doveva eser fato Consejo de Pregadi clamado
 » tuti debia ben vegnir a quello e ascholtar, et intender, e responder ale parte sera ale-
 » gade, e provade, e apresso eser ben dechiarade, a tute le scritture de intrambe le parte
 » di sovraditi Papa, e concluxo, et intexo ben tute raxon, privado fuora i parenti de
 » intrambe le parte, o che per parentado se apartegnise, i qual non possa a quel ponto
 » meter balota in favor de alguno de quelì, i qual plu balote averà de tuto el chonseio
 » sia fermo e stabele da quello tegnir et obedir. De qua in driedo diremo chomo a que-
 » sti fati sarà declarado

» Chorando MCCCCIX. dy 22 d'avosto. Per lo Chonseio de questo Misier lo Doxe
 » con esso la Signoria siando al numero de persone 131, fo prexo in Pregadi de tuor
 » la hobedientia a Papa Gregorio XII, benchè anchor fose fato per avanti un altro Chon-
 » sejo, circha de questi fati al tuto per dar risposta a tutte le ambassade antidite ve-

(1) Così il mss. Tale cognome non veggo nella Serie de' Cardinali; e allora n'eran varii Cardinali col nome di *Pietro*. Il Sanuto ommise il nome dicendo: *etiam venne uno di Papa Alessandro V.*

(2) Per esser cose che appartiene (la Delfina).